

Sekolah ajar anak erti kehidupan sebenar

Cuti persekolahan akan berakhir minggu hadapan dan bermulalah semula sesi persekolahan yang baharu untuk tahun 2015. Ibu bapa paling sibuk pada masa ini membuat persiapan dan kelengkapan untuk anak mereka sebelum memulakan persekolahan. Bermulalah episod baharu di dalam diri anak ini.

Alam persekolahan bukan sahaja memberi satu pengalaman yang indah kepada kita semua tetapi sebagai tempat untuk membentuk diri dan menjadi lebih berdikari tanpa bantuan ibu bapa seperti berada di rumah. Jadi, sebelum anak ini memu-

lakan hari pertama sekolah, ibu bapa perlu beri sedikit pendahan supaya mereka seperti sudah biasa dengan suasana di sekolah.

Sebulan sebelum sesi persekolahan, mereka perlu sentiasa biasakan bercakap dengan anak sebab mereka ke sekolah. Lama kelamaan anak akan terima kerana sudah diperkenalkan mengenai keperluan ke sekolah.

Beli persiapan sekolah

Membawa anak ketika membuat persiapan dan kelengkapan akan menimbulkan perasaan seronok untuk ke sekolah nanti. Mereka

akan berpakaian baharu dan membawa beg dengan corak kegemaran mereka. Anak tentu rasa seronok dan tidak sabar untuk ke sekolah nanti.

Ibu bapa juga boleh bawa mereka ke sekolah baharu untuk memperkenalkan sekolah. Kemungkinan pada hari pertama nanti mereka boleh terima suasana di sekolah berkenaan. Membeli buku di kedai buku pada musim cuti sekolah boleh jadi kaedah memperkenalkan mereka dengan sekolah.

Selain itu, ibu bapa juga boleh ceritakan pengalaman yang menarik ketika mereka di sekolah dahulu. Pengalaman yang menarik boleh timbulkan minat dan perasaan suka kepada sekolah. Jangan sesekali sogok cerita seperti kegarangan guru sehingga boleh timbul perasaan takut. Cerita seperti ini sedikit sebanyak akan menyebabkan anak takut

dan tidak suka ke sekolah.

Belajar urus diri

Di sekolahlah mereka akan belajar urus diri sendiri tanpa bantuan orang lain. Mungkin kita lupa, anak yang baharu memasuki alam persekolahan juga perlu diajar mengenai cara menggunakan tandas selepas membubang air. Jika di rumah, mereka sudah biasa atau ibu bapa yang akan membantu tetapi ketika berada di sekolah mereka perlu lakukannya sendiri.

Juga di dalam hal pakaian misalnya pemakaian tudung, baju kemeja dan kasut perlu diberi sedikit tunjuk ajar sebelum mereka ke sekolah. Jika di rumah, ibu bapa atau kakak dan abang boleh membantu tetapi di sekolah perlu melakukannya sendiri.

Anak yang diberi wang saku juga perlu diberitahu mengenai

penggunaan wang dengan jumlah barang yang ingin dibeli. Sebenarnya, mengajar anak menggunakan wang yang dibekalkan itu boleh mendidik juga mereka untuk berjimat di dalam penggunaan wang mereka.

Sebagai ibu bapa walaupun kadangkala timbul perasaan bimbang dengan anak untuk memulakan hari baharu di sekolah tetapi perlu sedar bahawa di sekolah mereka akan belajar erti kehidupan, perasaan, moral dan sebagainya.

Di sekolahlah mereka belajar bergaul dengan rakan sebaya. Semoga anak yang bakal memulakan alam persekolahan ini akan memperoleh ilmu yang baik dan bermanfaat untuk mereka hadapi masa akan datang.

Azizan Arshad,
Perpustakaan Perubatan Veterinar,
Universiti Putra Malaysia.